

## Stòria de su Comunu



Sa bidda de Uda tenit orìgini antiga e is repertus archeològicus chi si fuit agataus si faint a comprendi ca su territòriu suu dd'ant frecuentau popolatzionis diversas gai de s'època de su Neolíticu.

Su tzentru urbanu in is ùrtimus annus s'est ammanniau meda.

Gai ca est una bidda acanta de Casteddu (est atesu prus o mancu 23 chilòmetrus) is residentis fuit aumentaus


A dolu manu su patrimòniu edilitziu stòricu s'est spèrdiu po mori de is undas chi nci fiant medas bortas innantis chi si fuit fatas is òperas de arrangiamēntu idràulicu e po mori de de su materiali chi imperànt po ndi pesai is domus, **su ladiri**,” matonis cruus de ludu e palla chi a cuntatu cun s'àcua si sciusciànt faendi arrui o a dònnia manera faiat dannus meda a s'edifitziu.

Abarrat calincunu fàbbricu de su cumentzu de su '900 chi at allogau in parti sa tipologia originària tìpica de is biddas de su Campidanu: costruzioni in s'oru de sa bia, pianu terra e primu pianu, corti interna innui s'intrat de su portali tìpicu, nuradura in làdiri apitzus de su

basamentu in perda, crabetura a duas àcuas cun tèula curva apitzus de una strutura in linna e canna (**s'incannitzau**).

Is costruzionis afatantis, a cumentzai de pustis de sa Guerra, su funt fatas cun tipologias diversas de materialis chi ant spèrdu una parti de s'identidadi originària.

In is ùrtimus annus si biit unu svilupu edilitziu armònicu e ordinau.



## Su Territòriu

Su **Comunu de Uda** s'agatat in su Pranu de su Campidanu de Casteddu, intra is duus arrius Cixerri e Mannu, in d'un'àrea ampra prus o mancu 134 km<sup>2</sup>.

A sa bidda si podit intrai de duus ladus, a nord de sa Strada Stadali 130 e a Sud de sa Strada Provinciali “Pedemontana”.

Giai ca est bastante acanta de Casteddu (23 km prus o mancu) in is ùrtimus annus sa bidda at tentu unu svilupu edilitziu de importu e at biu crèscia sa popolatzioni, difati in dì de oi is residentis lompint a 7830.

## Àrees naturalísticas

Su territoriu de Uda gosat de unas cantu àrees de grandu interessu ambientali, naturalisticu e paesagìsticu, massimamenti in logu de **Monti Arcosu**, chi stràngiat s'Oasi de su WWF, **Sa Spìndula**, **Monti Lattias** e aigi sighendi.

Massimamenti s'Oasi de su WWF permitit de gosai de unus cantu “caminus de naturalesa” chi si podint visitai po ammirai is variedadis de bèstias e matas arestis ma is paesàgius spantosus puru..

Connota meda po sa bellesa cos sua est sa cascada de **Sa Spìndula**.

**Su prantedu** est cussu tìpicu de su cràchili mesuterràniu e ddoi agataus pruschetotu **murdegu**, **modditzi** e **murta**, invècias in is logus de monti s'agatant padentis de ìlix e suèrgius..

In is caladroxa s'agatant puru padentis de matas de carruba.

**Sa fàuna aresti** est formada po su prus de **cervus**, **sirbonis** e **crabiolus**, ma s'agatat puru su **gatu aresti**, su **margiani** e **s'àchili**, e puru de diversas spècias de tzerpis e anfìbius, cumenti a su **scraponi de fogaja**.